

兩  
浙  
名  
賢  
錄

兩浙名賢外錄卷之六目次

空空

宋一

清辯

環省

贊寧

自詢

願昭

道榮

法齊

從朗

行滿

咸潤

師蘊

常省

文輦

慶祥

皓泰

曇穎

脩已

清簡

志蒙

德聰

契嵩

懷璉

重顯

義懷

了元

智禮

元照

譚禪師

繼忠

元覺

遵式

悟法師

祖韶

源禪師

守宗

元淨

德章

本如

坦禪師

痴海

子璿

清澈

智才

處謙

子鴻

智遷

梵言

善孜

了然

真淨

淨端

惟正

維琳

善本

資禪師

則全

崇福

正彥

僧印

艮俊

潛叟附

慧才

法英

義欽

義海

體宗

齊玉

惟鎮

守一

晉良

可齊

守卓

常利

法晝

慧元

戒禪師

正覺

淨源

景深

智朋

道平

普能

繆道者

法如

如庵主

如哲

淨梵

惟尚

法寧

寶月

楚明

思慧

果昌

慧辯

有規

惟湛

從諫

妙源

梵卿

澄月

照伯

法濟

日益

淨曇

法達

立禪師

懷志

印首座

德週

法空

性空

道琛

道隆

普崇

法一

清了

法清

佛心

象禪師



兩浙名賢外錄卷之六

東海徐象梅仲和氏譔

武林吳慧龍仲飛氏閱

空空

宋

清辯

清辯宣平人遺其姓氏得道於烏巖每乘虎下山乾德  
初創淨妙寺工畢其虎誤爲鄉人所殺後知爲辯師脚  
力自悔捨田二十畝入寺償之至今寺有償虎田

瓊省

瓊省溫之陶山人姓鄭氏稚齒出家棲心圓頓嘗閱楞  
嚴經文理宏濬未能洞了一夕夢口輪墮空張口吞之  
自是倏然發悟差別義門渙然無滯後嗣法永明傳衣  
去開寶三年勅住寶雲寺學者臻萃法音大振未幾  
示疾忽現寶樹浴池省曰凡所有相皆是虛妄言訖安  
坐而化

贊寧

贊寧德清人姓高氏出家祥符寺習南山律宗著述甚

尼時人謂之律虎。宋初徵入汴京爲僧錄。太祖行香至相國寺。問曰。朕見佛拜是不拜。是對曰。現在佛不拜。過去佛。太祖大喜。遂爲定禮。太平興國三年。太宗召對滋福殿。詔脩高僧傳三十卷。又著內典集一百五十卷。外學集四十九卷。至道二年示寂。歸骨龍井塢。謚曰圓明大師。

自詢

自詢號國一道者。傳法於了定。大寂禪師。嘗然一臂供佛。雍熙初。勅建受業寺。詢然身以報火。滅舌根不壞。

願昭

願昭錢塘人出家保清院受業後參靈隱清聳禪師發  
明心要衆請出世于秀州羅漢院上堂示衆曰山河大  
地是善知識時時說法時時度人不妨諸上座參請僧  
問羅漢家風請師一句願曰嘉禾合穗上國傳芳曰此  
猶是嘉禾家風如何是羅漢家風願曰若到諸方分明  
舉似次遷杭之香嚴寺無疾示滅

道榮

道榮不知何許人淳化中居長隴院習禪定靈異頗多

時人稱爲羅漢。旣入滅。人有見於壽昌五百應真位者。  
今肉身留存。

### 法齊

法齊。婺州人。姓丁氏。始講百法。因明二論。尋置講遊方。  
受心印於廣法大師。遂居長春。稱第二世。開筵聚衆。隨  
機說法。僧問城東老母與佛同生。爲什麼却不見佛。齊  
曰。不見。卽道。曰。恁麼。卽見去也。齊曰。城東老母與佛同  
生。太平興國三年。捨衆。冥居。至咸平三年。示寂。壽八十  
九。臘七十二。

從朗

從朗不知其所自出居蕭山祇園寺年踰百歲門嘗晝掩每誦蓮經羣鳥銜花匝座潘閭嘗謂之閉門不納

行滿

行滿聶州南浦人聞法石霜來游天台棲華頂峰智者院知衆僧茶竈剏采埋名人不能窺其際居房檻外有一巨松橫枝之上寄生小樹每遇滿出坐寄生木必矍矍垂枝時謂此樹作禮茶頭或不信者專俟滿出則垂幹紛披滿去則屹然亭立更無搖動雖隨衆食少分而

止四十年內人未見其便溺一日忽語人曰我當行矣  
令衆僧念文殊名號相助默焉坐化

咸潤

咸潤上虞人習天台教觀依錢塘會法師講遂寃其去  
景德四年邑令裴煥請演教於等慈繼徙隆教永福法  
音所震聽者動以千計禪寂之暇頗以筆墨自娛有五  
洩山之學院十題編於報英

師蘊

師蘊金華人初與韶國師結侶游方性滑稽出語諧謔

高達者多訾其狂。獨詔師默而識之。語人曰。蘊公痴狂。吾不測其邊際也。因有疾。求僧作懺悔文。所誦過經文。及密呪各論。以幾百藏爲度。始知其密持之不懈。開寶六年。無疾坐終。闍維。舌根不壞。灰寒拾之。如紅芙蓉色。柔軟可憐。或曰。是僧別無奇異。此物偶存耳。乃重燔其舌。隨同火色。遲久還如蓮葉。蘊生不言姓氏。年齒人以貌取之。則年八十餘矣。

省常

省常錢塘人。結淨行社於西湖。刺血寫淨行品。雕彌陀



像與公卿牧伯二十人比丘千餘人整心西向王文正公旦爲之首臨終唱佛來迎化後日地變金色移時始滅

### 文輦

文輦永嘉陽平人得法明昭禪師楊駒之間決了疑滯旋遇天台韶國師唱宗一大師之道輦復諦受無疑不爲異緣牽轉嘗謂人曰悟入之緣猶蠅屈之於葉也食黃則身黃食蒼則身蒼其屈伸之狀無變吾初見明昭乃若是今學玄沙又如。是此所謂殊途而同歸今更取

佛經爲定量之。乃覽大藏經三遍。自是以來。逍遙無滯。  
太平興國三年。操斧自造木龕。巧結玲瓏。重攢題湊。號  
曰浮圖。入內跌坐。自持火炬。誓之日。焚此業軀。供養十  
方諸佛。聖賢言已。發焰亘空。其烟五色。旋轉氤氲。猶聞  
誦經之聲。須臾始絕。觀者號泣。灰寒收舍利。不知顆數。  
世壽八十有四。

慶祥

慶祥。杭人。姓祝氏。有辯才。多聞強記。受業於祥符寺。學  
南山律。兼通六籍史書。莊老百氏之學。撰高僧傳三十

卷淳化二年預史館集新書五年遷左街僧錄王內翰  
贈詩云詔脩僧史浙江濱萬卷書中老一身其爲時賢  
推重如此號曰九曲禪師

皓泰

皓泰河東人初叅琅邪邪問埋兵掉闔未是作家匹馬  
單鎗便請一見泰指邪曰將頭不猛帶累三軍邪打泰  
一坐具泰亦打邪一坐具邪接住曰適來一坐具是山  
僧令行上座一坐具落在甚麼處泰曰伏惟上饗邪拓  
開曰五更清早起更有夜行人泰曰賊後張弓邪曰且

坐禪茶後住安吉州天聖寺開壇說法僧問如何是佛  
秦曰黑漆聖僧曰如何是佛法大意秦曰看瘡如土  
色

雲頴

雲頴杭州丘氏子首謁大陽玄禪師便問洞山特設偏  
正君臣意明何事陽曰父母未生時事頴曰如何體會  
陽曰夜半正明天曉不露頴罔然遂謁谷隱聰禪師復  
舉前話隱曰大陽不道不是祇是口門窄滿口說未盡  
老僧卽不然頴問如何是父母未生時事隱曰糞壑子

穎曰如何是夜半正明天曉不露穎曰牡丹花下睡猶  
兒穎愈疑駭一日普請隱問今日運薪耶穎曰然隱曰  
雲門問僧人般柴柴般人如何會穎無對隱曰此事如  
人學書點畫可効者工否者拙蓋未能忘法耳當筆忘  
手忘心乃可也穎於是默契良久曰如石頭云執事  
元是迷契理亦非悟隱曰汝以爲藥語爲病語穎曰是  
藥語隱呵曰汝以病爲藥又安可哉穎曰事如函得蓋  
理如箭直鋒妙無有加者而猶以爲病實未踰旨隱曰  
妙至是亦祇名理事祖師意旨智識所不能到矧事理

能盡乎。故世尊云。理障礙。正見知。事障續。諸生死。誤恍如夢覺。曰。如何受用。隱曰。語不離窠。曰。安能出。蓋纒頰歎曰。纒涉唇吻。便落意思。盡是死門。終非活路。後住潤州金山開堂說法。每以此爲提唱。上堂云。三世諸佛是奴婢。一大藏教是涕唾。良久曰。且道三世諸佛是誰。奴婢乃將拂子畫一畫曰。三世諸佛過這邊。且道一大藏是誰涕唾。頰乃自唾一唾。便下座。

脩已

脩已杭州人。少與浮山遠公遊。嘗卓庵廬山佛手巖。後

至四明杖錫山獨居十餘載虎豹爲隣嘗曰羊腸鳥道  
無人到寂莫雲中一箇人爾後道俗聞風而至遂成禪  
林僧問如何是無縫塔已曰四稜著地曰如何是塔中  
人已曰高統無憂問如何是祖師西來意曰船船過海  
赤脚回鄉

清簡

清簡錢塘人姓張氏爲事孤潔時謂之簡潔嗣法歸宗  
柔禪師住明州天童寺僧問如何是祖師西來意簡曰  
不欲向汝道曰請和尚道簡曰達磨不可再來也晚居

雪竇而終塔於寺之東南隅

志蒙

志蒙婺人不知得法之自好衣錦繡往來關關間丐錢市猪首克饌或伺所遺骨骼終不能覩因號猪頭和尚凡言人災福皆驗景德三年秋忽往三衢郡人遮道留之不可抵衢之吉祥院浹旬需湯澡潄自述偈曰古貌昂藏法中之王猪頭千箇不把片嘗陶其真性吾是定光端坐而化越七日異香滿室後寺罹火殿宇煨燼而真體巍然獨存賜謚慧通大師



德聰

德聰姑蘇張渾人初入杭州慈光院受具戒於梵天寺。參請諸方密契心印。太平興國三年結廬余山之東峰。有二虎爲之護。名大青小青。行則隨侍前後。有禪者造之。見掛一書梁間。問之曰。此佛經也。問嘗讀否。曰。如人看家書。旣知之矣。何再讀爲。嘗曰。古人貴行。吾何言哉。其他問者皆默不對。天禧元年七月。趺坐而逝。閱月。親如生葬余山峰後。遷於南嶺。聰嘗住超果寺。慶依尊者。自杭州奉觀音像來。聰預告衆曰。三日內當有主公至。

反期果然，今起果奉爲開山祖師。

莽嵩

莽嵩，藤州鍾津李氏子。嗣法洞山住杭之佛日庵。世間經書章句，不學而能作。原教論十餘萬言，明儒釋之道一貫，以抗宗韓排佛之說。又著禪門定祖圖，傳法正宗，輔教編，進之仁宗皇帝，行傳法院，編次入藏。下詔褒嘉，賜號明教大師。熙寧四年六月四日晨興，寫偈曰：「後夜月初明，吾今喜獨行。不學大梅老，貪聞鼯鼠聲。至中夜而化，關維不壞者。」五曰：「頂曰耳，曰舌曰童真。」曰：「數珠其

頂骨出舍利紅白晶潔道俗合諸不壞葬於故居永安之左有文集二十卷曰鐔津盛行於世

### 懷璉

懷璉漳州龍溪人姓陳氏誕生之夕夢僧伽降室因小字泗州卯角圓頂篤志道學一日洗面潑水於地微有省發卽慕叅尋遠造泐潭投機印可師事十餘年去遊廬山爲圓通訥禪師掌記皇祐中仁廟詔住淨因禪院召對化城殿問佛法大意奏對稱旨賜號大覺禪師又詔入對便殿賜羅扇一把題元寂頌於其上與璉問答

詩頌書以賜之。凡十有七篇。至和中乞歸老山中。帝不允。宣諭曰。山即如如體也。將安歸乎。再住京國。且與佛法。璉復以頌謝。帝遣中使賜龍腦鉢。璉謝恩畢。捧鉢曰。吾法以壞色衣。以瓦鐵食此鉢。非法。遂焚之。中使回奏。帝嘉歎不已。治平中。再上疏乞歸。英廟依所乞。賜手詔。放歸林下。璉既渡江。初住西湖。受請居四明。阿育王寺。建大閣。藏所賜詩頌。榜之曰。宸奎閣。其碑文。則蘇子瞻手筆也。嘗上堂示衆曰。應物現形。如水中月。遂拈起拄杖曰。這箇不是物。即今現形也。且道月在什麼處。良久。

日長空有路，還須透潭底。無蹤不用尋，擊香臺下座。

重顯

重顯字隱之，遂寧人。少依益州普安仁銑爲師，落髮受具，出蜀浮沈荆渚間。嘗與谷大陽、與客論趙州宗旨，爲苦行韓大伯所笑而去。客退，顯數之曰：「我偶與客語，爾乃敢慢笑。笑何事？」對曰：「笑知客智眼未正，擇法不明。」顯曰：「豈有說乎？」對以偈曰：「一兔橫身當古路，蒼鷹纔見便生擒。後來獵犬無靈性，空向枯椿舊處尋。」顯陰異之，結以爲友，遂捨去。徧叅諸方，語多不契。後至復州北塔，祇

禪師者香林遠公嫡子雲門之孫也知見高學者莫能  
逮其機顯俊邁祚愛之遂留五年盡得其道將游靈隱  
與曾學士遇於淮上曾曰靈隱珊禪師吾故人也以書  
薦顯顯至靈隱三年陸沅中俄曾奉使浙西訪顯於  
靈隱無識之者時堂中僧千餘使吏檢床歷物色求之  
乃至曾問向所附書顯袖納之曰荷公意動然行脚人  
非督郵也曾大笑珊公以是奇之吳江翠峰虛席舉顯  
出世後住明州雪竇宗風大振天下龍蟠鳳逸衲子爭  
集座下號雲門中興顯嘗經行植杖衆衲環之忽問曰

有問雲門樹凋葉落時如何。曰。體露金風。雲門答這僧。  
邪。爲解說耶。有宗上座曰。待老漢有悟處。卽說。顯熟視。  
驚曰。非韓大伯乎。曰。老漢管地也。於是令搥鼓。衆集。顯。  
曰。大衆。今日雪竇宗上座。乃是昔年大陽韓大伯。具大。  
知見。晦迹韜光。欲得發揚宗風。幸願特升此座。宗遂升。  
座。僧問寶劒未出匣時如何。曰。神光射斗牛。又問出匣。  
後如何。曰。千兵易得一將。難求僧退。宗乃曰。寶劒未出。  
匣。神光射斗牛。千兵雖易得一將。寶難求。便下座。一衆。  
大驚。暮年悲學者。尋流失源。作爲道日。損偈曰。三分光。

陰二早過靈臺一點不措磨貪生逐日區區去喚不回頭爭柰何餘激揚宗旨妙語徧叢林皇祐四年六月十日沐浴罷整衣側卧而化

義懷

義懷溫之樂清人世以漁爲業兒時坐父船尾漁得魚付懷懷輒放之江父怒笞詬甘之不以介意長遊京師依景德寺天聖中試經得度懷清癯行步遲緩衆中望見如鶴在鷄羣時有言法華者不測人也行市井拊懷背曰臨濟德山去懷初未喻問耆宿耆宿曰汝其當宏



禪宗乎行矣。勿滯於此懷。遂東遊。至於翠峰。翠峰衆盛。  
懷當營炊。自汲澗。折擔。悟旨。顯公印可以爲奇。辭去。久  
無耗。有僧自淮上來。曰。懷出世鐵佛矣。顯使誦提唱之。  
語曰。譬如鴈過長空。影沉寒水。鴈無遺蹤之意。水無留  
影之心。顯激賞。以爲肖已。先使慰撫之。懷乃敢通門人  
之禮。然諸方服其精識。自鐵佛至天衣。五遷法席。皆荒  
涼處。懷至。必幻出樓閣四事。成就晚示疾。將化。弟子智  
才問。卵塔已畢。如何。是畢竟事。懷豎拳示之。遂倒卧。推  
枕而寂。崇寧中。勅謚振宗大師。

了元

了元佛印禪師浮梁林氏子誕生之時祥光上燭鬚髮覆眉顰犀盈口稍長風骨秀拔有異常見發言吐論皆詮經史間里先生目曰神童年纔舞象名擅雕蟲咀嚙典墳笑談今古拾俗試經圓具感悟有如夙習遍詣諸方契機開先法席出爲宗匠辯才無礙肆口而談無甚般若名傾朝野神宗賜高麗磨稍金鉢以旌其德一日與學徒入室次適東坡居士至元曰此間無坐榻居士來作甚麼東坡曰暫借和尚四大爲坐榻元曰山僧有

一聞居士若道得卽請坐道不得卽輸腰下玉帶予舉  
號欣然曰請道元曰居士適來道暫借山僧四大爲坐  
榻祇如山僧四大本空五蘊非有居士向甚麼處坐居  
士不能答遂留玉帶元却贈以雲山衲衣後東坡守杭  
請居聖水寺次徙雪芝兩處開筵說法學徒輻湊元性  
滑稽每以諧語接人時有殿巖王觀父請元說法元升  
座唱曰此一辦香爲掃烟塵力士護世界天王殺人  
不貶殿上將軍立地成佛大居士王大喜以其久卽多殺  
人也東坡貶惠州時元致書云子瞻賢高材遠放寂寞

之濱。權臣忌子瞻爲相耳。人生如白駒過隙。二三十年功名富貴。轉眼成空。何不一筆都勾。尋取本來面目。子瞻讀書萬卷。而未知性命所居。不可謂之聰明也。努力向前。珍重珍重。後莫知所終。

### 智禮

智禮字約言。姓金氏。鄞人。自幼神情湛寂。骨幹英粹。登年受具。究心禪理。從寶雲義通傳天台學。通曰。法界自有次第。若當奉持。禮曰。何謂法界。通曰。大總法相。圓融無碍。是名法界。禮曰。旣曰無碍。次第安有。居三年。輒罷。

講席咸平初郡大旱與僧乞式然指以祈觀音誓曰果  
不雨當焚身三日雨大至撰不二門指要鈔及語難書  
天禧間脩法華懺顯四淨土之道真宗賜號法智大師  
天台智者之學禮爲中興云

### 元照

元照錢塘人自幼出家博究羣宗初居天台徙杭之東  
藏學者爭從之晚振錫姜山愛其深秀遂結茆投老道  
法益高勤於著述有資持記濟緣記行宗記應法記往  
法記報恩記及刪定尼戒本金刪疏等書蘇東坡嘗就

之書像薦母未幾坐脫西湖漁人皆聞天樂聲祥光五色燭於湖面良久乃隱

譚禪師

譚禪師不詳姓氏住諸暨報恩寺嗣法雲蓋山繼鵬禪師僧問如何是祖師西來意譚曰隻履已歸慈嶺久而今休更問來端僧曰便與麼時如何譚曰南山起雲北山下雨問杖錫已居於此日請師一句利人天譚曰鼻孔大頭向下僧曰向上還有事也無譚曰欲穷千里目更上一層樓乃曰法身無像應物現形拈拄杖示衆曰

世尊身長丈六、這箇拄杖子亦長丈六、彌勒身長千尺、這箇拄杖子亦長千尺、方圓任器、隱顯從他、大包天地、細入微塵、如監覲井、如井覲監、得之者、運籌帷幄、把斷要津、失之者、杳杳忽忽、虛生浪死、得失二途、一時放却、敢問諸人、且道山僧拄杖子、畢竟長多少、良久曰、笑指客從來處來、擊香臺一下、

繼忠

繼忠永嘉人、父母乞嗣於天台章安佛祠、後夢僧授以子曰、此螺溪尊者也、寄汝養之、方娠、母卽厭葷、八歲落

髮受戒長習經律勞苦得疾不瘥乃精脩觀音三昧恍  
見大士授水灌頂遂瘳四明延慶廣智大師傳天台教  
往就學代師講演雪竇見而歎曰此法器也歸住法明  
寺學徒雲湧法席之盛爲東南冠元豐五年正月八日  
夜集衆告別有登吾道場者生生世世不失人身之誓  
著扶宗集五十卷趙清獻朴賛之云教明圓通聽衆俛  
嚮以心傳心以真破妄真今謂何有相非相如水中月  
如鏡中像

元覺



元覺婺州義烏人。姓傅氏。大士翁之裔也。夙脩種智。隨願示生。七歲出家。十歲遊方。逮造石霜。陞於丈室。慈明一見曰。好好。着槽廠去。覺遂作驅鳴。明曰。真法契也。俾爲侍者二十年。運水搬柴。不憚寒暑。後出世蘓臺。府帥請居誌公道場。提綱宗要。機鋒迅敏。解行相應。諸方推服。次居蔣山。丞相王安石旣避賢路。與覺結廬定林山中。逍遙物外。清談終日。贈覺頌曰。不與物違。真道廣。每隨緣起。自禪深。舌根已淨。誰能壞。足跡如空。我得尋。當時以爲希有。僧問如何。是諸佛出身處。覺曰。驢胎馬腹。

問魯祖面壁意旨如何。覺曰：住持事繁，問如何是大善知識。覺曰：屠牛割羊，曰爲甚麼如此。覺曰：業在其中。元祐元年，覺乃遷化。王安石慟哭塔下，讚其真曰：賢師人也。行厲而容寂，知言而能嘿。譽榮弗喜，辱毀弗戚。弗矜弗失，人自稱德。有緇有白，來自南北。弗順弗逆，弗抗弗抑。弗覩汝華，惟食已實。孰其嗣之，我有遺則。

遵式

遵式，寧海人，字知白。母夢吞珠而生。傳天台教於寶雲。然頂誓行四三昧法。時北宗多輕台教，乃伏闕上書，請

以止觀入藏。因章獻太后請懺。爲著懺文。行懺多異。人咸稱爲慈雲懺主。逝日。星隕。自云。生於上品。焚餘三指。不壞。賜號正覺禪師。

### 悟法師

悟法師。錢塘人。出家天竺。精持大悲呪。身出舍利。供像亦如之。因晝夜不廢誦。誓焚身助王旦遵式。冥求感動。天聽入台。教於藏中。旣如願而焚。薪盡不壞。

### 祖韶

祖韶。天台人。年十九。通法華。得度。希慈雲得其法。與慈

雲命補其法席。化行兩浙。壽七十二。無疾坐脫。賜號明智法師。

源禪師

源禪師。未詳氏族。嗣法石霜住安吉州廣法院。僧問。如何是正法眼。源曰。眉毛下。曰。便與麼會。時如何。源曰。瞳人笑點頭。上堂。若論此事。切莫道著。道著。卽頭角生。有僧出曰。頭角生也。源曰。禍事。曰。某甲罪過。源曰。龍頭蛇尾。元豐八年十月十二日。忽書偈曰。雪鬢霜髭九九年。身有義。袖盡諸緣。廓然笑。指浮雲散。玉兔流光照大千。

擲筆而寂。

### 守宗

守宗金華人。少出家。即誓擔正法。遊歷諸方。遍參尊宿。所至晝則丐食。夜棲樹下。未嘗掛名床曆。既還廬於院北。環植七松。餘四十年。精脩不怠。鄉人敬禮之。咸稱七松大士。元豐六年。跌坐而化。火後。妙香滿野。獲舍利皆五色異光。

### 元淨

元淨字無象。於潛人。生不如葷血。十歲出家。見講堂座。

師曰吾願登此說法度人十八從慈雲入法智室夙夜  
服勤不怠年二十五爲大妙門賜紫衣號辯才大法師  
沈文通字杭迎住天竺頓增舊礎學徒四集無不飽餐  
法味而去居十七年還於潛繼素懇請復歸天竺趙清  
獻持贊曰師去天竺山空鬼哭天竺師歸道場光輝晚  
居龍井法界觀成眉間性往自湧舍利肩現袈裟條八  
十一如住世之數與東坡居士爲方外交及卒蘇頌謫  
爲撰塔銘

德章禪師初住大相國寺西經藏院慶曆八年九月二  
日仁宗皇帝詔章於延春閣下齋宣普照大師問如何  
是當機一句章曰一言迺出青霄外萬仞峰前險處行  
日作麼生是險處行章便喝曰皇帝面前何得如是意  
日也不得放過再宣入化城廐齋宣守賢問齋筵大啟  
如何報答聖君章曰空中求鳥跡日意旨如何章曰水  
內覓魚蹤章進心珠歌曰心如意心如意任運隨緣不  
相離但知莫向外邊求外邊求終不是枉用工夫隱真  
理藏心珠无燿日秘藏深密無形覓拈來掌內衆人驚

三乘精進爭能測。碧眼胡貊指出時。臨機妙用何曾失。  
尋常切忌與人看。大地山河動。岌岌皇祐二年乞歸山。  
林養老御批杭州雪隱寺住持賜號明覺大師。

本如

本如句章人。初學於法智。有悟。作頌曰。處處達路頭。頭  
頭是故鄉。本來成現事。何必更思量。法智肯之。講說教  
論從者。如歸慶曆二年。賜號神照。嘗居白蓮寺。有虎睡  
西南隅。以杖擊之曰。此非汝睡處。虎俛首而去。歿之久。  
所居梁木俱折。體間異香。比塋。發龕。顏貌如生。爪髮俱



長塔之近地。一日生青蓮花。趙清獻拈爲作行業記。

### 坦禪師

坦禪師永嘉牛氏子。業打銀。因淬礪瓶器。有省。卽出家。叅瑯琊。機語頓契。後依天衣懷禪師。時住興教。擢爲第一座。衣受他請。宛守聞景張。請坦繼衣法席。坦方陞座。有雪竇化主省宗出問。諸佛未出世。人人鼻孔撩天。出世後爲什麼杳無消息。坦曰。鷄足峰前風悄然。宗曰。未。在。更道。坦曰。大雪滿長安。宗曰。誰人知此意。令我憶南泉。拂袖歸衆。更不禮拜。坦曰。新興教。今日失利。更歸方

丈令人請宗至。坦曰：適來錯紙對一轉語。人天衆前何不禮拜。蓋覆却。宗曰：大丈夫膝下有黃金，爭肯禮拜無眼長老。坦曰：我別有語在。宗乃理前語。至未在更道處。坦曰：我有三十棒寄你打雪竇。宗乃禮拜。

### 痴海

痴海龍泉人，崇因寺僧也。性多騃，故名痴海耳。無垂珠唇，不蓋齒。其師語之曰：汝貌陋福薄，宜自勉。痴海感其言，日至東廊觀音堂焚香百拜，每一拜以手覆落其唇并耳。三年不怠，不覺上唇下垂而兩耳及肩。痴海拜不

已一日睡於蒲團夢所拜觀音垂手摩其頂曰賜汝聰明福相寤覺心境廓然如脫重病遂通諸部經典後著金山水陸儀文盛行於世永嘉江心寺碑其手筆也

子璿

子璿嘉興人自落髮誦楞嚴不輟從洪敏法師講至動靜二相了然不生有省謂敏曰敲空擊竹卽落筌蹄舉目揚眉已成擬議去此二途方契斯旨敏拊而證之然欲探禪源罔知攸往聞瑯琊道重當世卽趣其席僧上堂次出問清淨本然云何忽生山河大地琅邪憑陵峇

日清淨本然云何忽生山河大地。璿領悟禮謝曰願侍巾瓶。瑯琊謂曰汝宗不振久矣宜勵志扶持報佛恩德勿以殊宗以介也。乃如教再拜後辭住長水。承稟日願衆曰道非言象得禪非擬議知會意通宗曾無別致由是二宗仰之。嘗疏楞嚴等經盛行於世。

清徹

清徹仙居人戒行高潔嘗截一掌爲衆祈雨應時大澍。年乃有秋庵前猛虎馴伏如畜犬然寂後鄉人漆其真身事之。

智才

智才禪師。台州金氏子。得法天衣。住臨安佛日庵。上堂。  
曰。無。今。無。古。不。改。絲。毫。離。少。離。多。身。無。二。用。諸。禪。德。既。  
身。無。二。用。爲。甚。麼。龍。女。現。十。八。變。君。不。見。弄。潮。須。是。弄。  
潮。人。僧。問。如。何。是。道。才。曰。水。冷。生。冰。曰。如。何。是。道。中。人。  
才。曰。春。雪。易。消。曰。如。何。談。論。才。鳴。指。一。下。

處謙

處謙永嘉人。姓潘氏。字終備。住白蓮院。戒律精嚴。四衆  
傾服。更爲王安石所知。適州旱。請謙禱雨於潭。謙至潭。

所振錫三下。大聲語龍曰。昔智者誨汝。旱則施雨。今偶  
忘之。耶言訖。雨大注。州民歡事之。號曰神悟大師。

### 子鴻

子鴻。丹丘人。姓吳氏。嗣天衣法席。住台之瑞巖。學徒雲  
聚。僧問如何是道。鴻曰。開眼覷不見。問法爾不爾。如何  
指南。鴻曰。語墮也。曰。乞師指示。鴻呵呵大笑。上堂。一不  
守。二不向。上下四維無等量。大海洋裏泛鐵船。須彌頂  
上翻簾浪。臨濟縮却舌頭。德山闊却拄杖。千古萬古獨  
巍巍。留與人間作榜樣。喝一喝。下座。

智遷

智遷杭州高氏子。得法懷禪師。住廬山棲賢寺。唱天衣之旨。僧問。一問一答。盡是建化門庭。未審向上更有事也。無遷曰。有。曰。如何是向上事。遷曰。雲從龍。風從虎。曰。恁麼則龍得水時。添意氣。虎逢山則長威。猛。遷曰。興雲致雨。又作麼生。僧便喟。遷曰。其更有在。僧擬議。師咄曰。念話。杜家上堂。是甚麼物。得恁頑頑。露露。眴眴。覘覘。拊掌呵呵。大笑曰。今朝把鼻直是黃面瞿曇。通身是口也。分疎不下。

梵言

梵言不知何許人。天衣之法子也。一席推爲首座。後住  
越州淨衆寺。法音大振。上堂云。南陽國師道。說法有所  
得。斯則野干鳴。說法無所得。是名獅子吼。國師怎麼道。  
大似掩耳偷鈴。何以故。說有說。無盡是野干鳴。諸人。  
要議獅子吼麼。咄。

善教

善教杭州人。得法懷禪師於臨安北山顯明。說法僧問。  
如何是祖師西來意。教曰。九年空面壁。慙又西歸日。



爲甚麼如此。攷曰。美食不中飽人餐。問如何是無情說法。攷曰。燈籠掛露柱。曰。甚麼人得聞。攷曰。墻壁有耳。

了然

了然。臨海人。姓薛氏。初母胡無子。禱於石觀音像。夢一老僧。手持蓮花。語曰。食是當脰。然非汝子也。生而起異。住白蓮寺。寺後有龍湫。路嶢歷。不便行者。然呪之。使遷。一夕大風雨。遂徙寬地。寧海建法會。請主法。席寐中。見有持牒來者。曰。兜率天。請師說法。又夢一龍。化爲神告曰。師七月當歸。既寤。并日說法。且誠且別。至期泊然安。

坐而逝。號智湧法師。

### 真淨

真淨不知其所自止。杭州淨住院。初參達觀禪師。問曰。某甲經論粗明。禪直不信。願師決疑。觀曰。旣不信禪。豈可曉經。禪是經綱。經是禪網。提綱正綱了。禪見經淨曰。爲某甲說禪看。觀曰。向下文長。淨曰。若恁麼。經與禪乃一體。觀曰。佛及祖非二心。如手搦拳。如拳舒手。淨因而有省。乃成偈曰。二十餘年用意猜。幾番曾把此心灰。而今潦倒逢知己。李白元來是秀才。

淨端

淨端吳興人。姓丘氏。始見弄師子者。發明心要。以彩角像其皮。時時著之。因號端師子。住西余山。嗣翠峰月禪師。每雪朝。著彩衣入城。小兒爭譁逐之。從人乞錢。得卽以散。飢寒者能誦法華經。湖人爭延之。必得錢五百。乃開帙目。誦數句。卽持錢地坐。檢缺薄者。易之而去。好歌漁父詞。月夕必歌之。達旦。有狂僧號回頭和尚。以左道鼓動流俗。士大夫亦安其妄。方對丹陽尹呂公肉食。端徑至。指曰。正當與麼時。如何是佛。回頭不能遽對。端極

其頭推倒乃行。又有妖人號不托。揭秀州城外。地有像。像建塔其上。傾城信敬。端見堪住曰。如何是佛。不托擬讓端趯之而去。章丞相子厚請升座。使俞秀老撰疏。叙其事曰。推倒回頭。趯番不托。七軸之蓮。經未誦一聲之演。父先聞端聽宣至此。以手拂榆曰。止。乃坐。引聲吟曰。本是瀟湘一釣客。自東自西自南北。大眾聞然稱善。端顧笑曰。我觀法王決法王法。如是下座。元祐初。圓照禪師自京師慧林退歸姑蘇。見端於甘露曰。汝非端師子乎。曰。是。圓照戲之曰。村裡師子耳。端應聲曰。村裏師子。

村裏弄眉毛與眼一齊動。開却口肚裏直籠統。不愛人  
取奉。直饒弄到帝王宮。也是一場乾打悶圓照。粹美不  
悟其机也。嘗客無錫。欲歸湖。旦行江上。問有湖秀便船  
乎。篙師曰。我行常潤船也。端欣然曰。亦可。乃附船尾。高  
郵秦觀少游聞其高道。請升座於廣慧。端以手自指曰。  
天上無雙月。人間只一僧。一堂風冷淡。千古意分明。少  
游首肯之。端高自稱譽。吐語奇怪。逸人也。病牙久不愈。  
謂衆曰。明日遷化去。衆以爲戲語。請說偈。索筆大書曰。  
端師子。大慵懶。未死牙齒先壞爛。二時伴衆赴堂粥飯。

空室外

卷之六

七

沈夢龍

都趕不辦。如今得死是便宜。長眠百事皆不管。五更造化。闕世七十有二。東吳祠之以爲散聖。

惟正

惟正錢塘黃氏子。住餘杭功臣山。年十八爲大僧。游方問道三十年。乃罷出入。嘗跨一黃犢。將侍郎堂出守杭州。與正爲方外友。每來謁。必軍持掛角上。人爭覲之。正自若也。至郡庭下。犢談笑終日而去。嘗作山中偈曰。橋上山萬層。橋下水千里。唯有白鷺鷥。見我常來此。冬不擁爐。以荻花作毯。納足其中。客至共之。夏秋好玩月。盤

膝大盆中浮池上自旋其盆吟笑達旦率以爲常有問者曰師以禪名而不談禪何也曰徒費言語吾懶寧假曲折但日夜煩萬象爲敷演耳言語有間而此法無盡所謂造化無盡藏也正風調高老益清癯嘗自贊其像曰貌古形疎倚杖藜分明畫出須菩提解空不許離聲色似聽孤猿月下啼

### 維琳

維琳湖州人嗣法育王建禪師初住大明僧問師唱誰家曲宗風嗣阿誰琳曰不在然燈前亦非釋迦後云莫

便是育王兒孫也。無琳曰：神岳峰高，尾間水急，問如何。是大明家風。琳曰：神鸞頂上軒眉坐，黃鶴岫中昂足行。云未審意旨如何。琳曰：會即便會，覓甚意旨。僧珍重便去。琳曰：聽取一偈：捐拙火殘飛白灰，老僧身上白如雪。地爐冥坐人不知，蒼猿山西叫明月。後住杭州徑山，號無畏禪師。

善本

善本，開封人。幼時母病，割股肉以進，疾愈出家，得華嚴經，開卷恍然心契，始知夙因之有在也。蓋旦夜精進，



不親席者二十餘年。遂博通諸經要旨。得無碍辯才。肆口所說。皆爲密諦。晚住杭之淨慈。繼住東京法雲寺。蘇子瞻作詩贈行。大觀二年終。葬大慈山崇德院塔。號定光。

### 資禪師

資禪師不知何許人。爲育王璉公法嗣。住臨平勝因。僧問。知師父蘊囊中寶。今日當場略借看。資曰。方圓無內外。醜拙任君嫌。云。心月孤圓。光含萬象。資曰。莫將黃葉作真金。問。菩提不可以心得。和尚從何而得。資曰。覲漢。

乃曰若論此事如日月麗天八方普照盲者不見盆下不知非日月不明乃當人障隔若論祖師正令擬議干差直須打透金鎖玄關一任縱橫妙用後不知所終

則全

則全字叔平姓施氏慈谿人落髮於保國寺南湖競推十六大弟子則全爲之首旁通諸史尤工著述性直氣剛敢言人過識者每言直心是道場若叔平真出家兒也住三學三十年郡守郎簡尤禮重之嘗語人曰叔平才氣凜凜然若衣儒衣冠儒冠者使簪筆荷橐立柱下

以職諫諍豈遂不若漢汲黯唐魏徵哉慶曆五年夏別  
衆坐亡世號三學禪師

### 崇福

崇福縉雲人年二十一祝髮於聖壽寺不啖酒肉貌偉  
氣克景祐二年大旱邑令同詣乳溪百丈潭請水忽有  
龍見爪福一履以去歲再旱福復至潭所忽湧出舊履  
甘雨隨至鄉人敬信之以爲慈氏下生也後入涅槃塑  
像祀之遇旱禱之立應

### 正彥

戒獨附

正彥不詳姓氏住温州彌陀庵人稱為庵主嘗謁雪竇  
良禪師良問云汝是有主沙彌無主沙彌彥曰有無且  
置和尚是有主禪師無主禪師良云却被葫蘆倒縛藤  
彥曰道什麼良擬對彥拂袖便出曰見面不如聞名良  
呵呵大笑至晚入室良不允彥乃有頌曰金刀剃落青  
絲髮求佛求法亦求真黃梅分付盧行者師今授手與  
何人後得法育王連禪師與臨安佛日戒彌和尚同稱  
法寶僧問彌如何是毘盧印彌曰草鞋踏雪曰學人不  
會彌曰步步成蹤時稱踏雪禪

僧印

僧印者承天簡禪師之法嗣也。住溫州瑞安。僧問如何是法身體。印曰。頭大耳小。如何是法身用。印曰。南原耕罷者。牽犢負樵歸。云。恁麼則三身不分也。印曰。大蟲看水磨。乃曰。將心問佛。如天遠。以佛求心。道轉賒。若遇雲門行正。令須教棒下識龍蛇。良久曰。具眼者看取。印於熙寧十年九月十三日。沐浴更衣。留偈曰。倚空雪劍冷。光浮佛祖魔。軍一刀收帶月。吼風歸寶匣。鐵牛驚散曲江頭。言訖。跏趺坐而逝。

良俊 清叟附

良俊蘭谿人出家聖壽寺清齋持律母老兄貧乃闢一室於寺側迎母供養於中朝夕躬致庖爨十五年母以聲衣鉢津送人稱其孝年七十二一旦無疾更衣而化時有潛叟者名自天居聖壽亦有孝行嘗卜地於橫山黃塢以塋其親仍構祠日報德君子曰出家兒不知有親久矣至勸人小作功德便唱言超生七世父母而垂自在堂反不知供養豈他人之過去者可以虛借自己之現在者難於實證耶此二僧既出世間而仍以世法

報親不滅人倫。不肯祖意出家。事親者宜以是爲法。

### 慧才

慧才永嘉之樂清人。入法智室。持大悲咒。恒百八遍。夢觀音解袈裟衣之。常校菩薩戒於雪峰。方羯磨觀音像。騰寶焰映奪日。燈壽八十六。更衣就坐。書偈泊然而化。有證戒光記。襄陽米蒲書。

### 法英

法英明州鄞人。姓張氏。得法九峰韶禪師。初住襄陽白馬上堂。示衆曰。至道無在。豈無在也。至言無窮。豈有窮。

也得之則皎若目前失之則毫厘有隔是故雖一大藏  
教不爲多言一默是耶豈曰無語須知佛祖人天殊非  
本有好看長短亦非本無直下薦得猶在迷途這箇是  
須遇明眼人證據始得次居大梅嘗有偈曰春山笋蕨  
正蒙茸好把黃梁徹曉春其謂西來無此意祖師渾在  
鉢盂中

義歡

義歡義烏人持戒甚堅精通教典創建興化院爲淨脩  
之所影不踰闕者五十年康定元年壽九十餘無疾端



坐而化。既葬累月。徧見夢於其徒曰。吾身當山。乃開龕。就視。腹肉如生。遂復迎入院。開維得五色舍利。有黃雲覆其上者。三日。因名其山曰雲黃。

### 義海

義海。雪川胡氏子。造雲居法席。居問甚麼物。恁麼來。海於言下大悟。遂呈偈曰。雲居甚麼物。問着頭恍惚。直下便承當。猶是生理沒。出世住報本。僧問。釋迦掩室於磨竭。淨名杜口於毘耶。未審如何示衆。海曰。汝不欲我開談。曰。未曉師机。曰。且退問。如何是無位真人。海曰。這裡

無安排你處後不知所終

### 體柔

體柔不詳姓氏。嗣法棲賢。謁禪師住安吉州之西。余開  
筵說法。四衆雲集。上堂示衆曰。一人把火。自燼其身。一  
人抱水。橫屍於路。進前則觸。退成滯。退後卽噎。氣填胸  
直待上天無路。入地無門。如今已不奈何也。良久曰。待  
得雪消去。自然春到來。

### 齊玉

齊玉。香川人。尚書莫公支子。法號慧覺。早親釋典。日記

數千言宣和六年遷居上天竺嘗終夜經行不息端坐  
合掌而化塋於山西塔曰慧寂

惟鎮

惟鎮錢塘人得法於棲賢遠禪師後住杭州南山之法  
雨說法無礙當時稱爲辯才僧問如何是法雨境鎮曰  
竹寺門相並湖山路接連云如何是境中人鎮曰芳草  
和花種脩篁帶雨移遂顧視大眾曰還知麼南山嶺頭  
白雲冉冉西湖畔上綠草依依一時驗取不用針錐喝  
一喝下座

守一

守一江陰人。姓沈氏。幼慕空門。圖照居瑞光時。遂投出家。更不他游。晨夕參叩。頓悟宗旨。後於秀州本覺出世。說法僧問離羣師子。踞地全威。不露爪牙。願聞哮吼。一云。大家着力。僧云。當年盧老曾饒舌。一日親聞第一机。一曰。脚跟下事作麼生。云。寶杖撥開千聖眼。當場辦取火中蓮。一曰。果然作家。乃曰。此一法印。非有所傳。曠劫保持。不從人得。包六虛而無外。渾十世以同時全提。則佛祖同沉放下。則聖凡交起。昭昭日用。森羅頓現。於虛。

光蕩蕩目前彼此無分於實際雖廓然泯迹流通於  
量義門間爾無依迥超於一切智地非文字相雖見聞  
緣諸乘由是莫能詮列祖於斯提不起此日人天既集  
不可徒然畧於建化門中普示諸人各請端心正視乃  
顧左右曰還見麼若恁麼承當得便乃機衡在握全歸  
闢外之權刹海澄波共助寰中之化又曰本分相見不  
在如何撩起便行猶爲鈍漢若也分賓分主俱爲念話  
杜家更乃說妙談玄不當宗門苗裔山僧恁麼道已是  
雪上加霜汝等諸人更擬覓箇什麼以拄杖一時趁下

晉良

晉良饒州吳氏子。嗣法於圓照宗本禪師。住衢州靈曜寺。趙清獻拈請開法於越之福果橋。之超化海會。靈曜四刹。法音大振。僧問三變禪林。四面出世。於和尚分上。成得什麼。良曰。鉢盂口向天。曰。三十年來闢振子。而今流得五湖傳。良曰。那箇是山僧闢振子。曰。一言超影象。不墜古人風。良曰。惜取眉毛上堂。不知時分之延促。不知日月之大小。灰頭土面。且與麼過。山僧每遇月朔。特地闌釘家風。抑揚問答。一場笑具。雖然如此。因風錄土。

借水獻花有箇葛藤露布與諸人共相解摘看蔞拈拄杖擊香臺曰叅堂去

可齊

可齊台州人姓應氏少依國清道才出家圓具初游講肆晚造圓照禪師法席薦機言下推爲首座衆請住安樂山次遷天童兩振法音流於四部僧問寶花王座今日師登祖意西來如何垂示齊曰華開巖畔千枝秀云便是和尚爲人處也無齊曰水瀉簷前一椽清問如何是道齊曰踏不着曰踏着後如何齊曰七穿八穴乃曰

一問一答一撥一掠千眼頓開澄涼皎月隨機施設縱奪臨時縱之則句句攢花簇錦處處釋迦道場奪之則一法不留千聖絕跡雖然如是須知有向上一竅還會麼良久曰莫謂春殘花落盡峰前昨夜一枝開

守卓

守卓不知何許人嗣法圓照禪師住雪竇實法藏上堂示衆曰好大衆龍種上尊王佛爲諸人現銀色世界瓊林玉宇剎剎交光寶殿銀城輝輝相映又色卽是空空卽是色色空空色休擬議空色色空成智慧耳聞眼見徧



河沙盡是如來真實地不得已向諸人道生是苦受是  
業滅可證道可脩以四諦十二因緣知苦斷集證滅脩  
道復曰有生可知有業可斷有滅可證有道可脩皆謗  
佛謗佛盡同魔說正當恁麼時且道作麼生會雪竇不  
免與諸人說破千峰積寒雪萬徑人踪絕壞衲擁枯槎  
是說如何說喝一喝便下座

常利

常利得法圓照禪師出世湖州報本大弘法席僧問如  
何得作佛去利曰煩惱裏薦取如何得離煩惱利曰對

面菩提問古鏡未磨時如何。利曰。照。磨後如何。利曰。黑。  
既是磨後爲什麼黑。利曰。爲汝要磨。問如何是無爲。利  
曰。有作如何。是有作。利曰。無爲。僧擬議。利曰。漆桶。這裡  
不是無爲。乃曰。今日月望。打箇糊餅。供養大衆。拈拄杖。  
作圓相曰。還識此餅麼。不但供養一人。千萬億人。祇是  
一箇。細嚼飽食。不得喫破。然雖如是。切忌麤生。叅。

法書

法書杭州徐氏子。出家圓具。聽習經論。過目不忘。人稱。  
夙解。後造瑞光投機開悟。先住天鉢。次徙香山。後被旨。

住東京慧林僧問山巖水壑盡是舊日家風拄杖淨瓶  
拈起新來活計古殿重開願聞舉要。晝曰擊大法鼓演  
大法義僧云恁麼則彌勒門開心頓曉德雲峰峻道何  
藏。晝曰你向甚處見彌勒僧云雲散長天星斗現月明  
沙界物難藏。晝曰休要費力乃顧大眾曰皇都禪刹慧  
休道場今日暫借山僧陞陟實愧非才於明眼人前提  
綱佛祖銜耀見知直饒說得天雨四花地搖六震一點  
也用不着蓋爲各各威光動地人人不欠絲毫然雖如  
是更有向上一路三世諸佛不能宣六代祖師拈不起

且道是什麼物。得恁麼奇怪。還屬得麼。良久曰。曹溪路坦平。莫強生荆棘。便下座。

慧元

慧元潮州倪氏子。年十九。受具游方。至京師。寓止華嚴。有圓明禪師者。見而異之。云。上人齒少。從何至此。所求何事。曰。慧元從南海來。無他求。惟求佛法耳。圓明笑曰。王城聲利捷徑。酒色樊籠。橫目爭奪。日有萬端。寧有佛法乎。佛法盡在南方也。元乃自京洛游襄漢。徧歷名山。遂至黃龍。時南新自積翠來。龍象四集。元每坐下記。

自引手反覆視之曰。寧有道理。而云似佛手。知吾家湖陽。而乃復問生緣何處乎。一日頓悟。盡釋所疑。遂入吳。開法於吳江壽聖寺。又住崑山慧嚴院。說法十年。道俗尊信。嘗自持鉢入湖。湖人云。師到處爲家。緣何獨愛姑蘇。因留不使還。蘇人聞之。爭持杖筇。譁以入湖。云何爲奪我邦善知識。政當見還。否則有死而已。元怡然不愠。情去留曰。吾任緣耳。相守彌月。蘇人食盡乃去。竟爲湖人所有。遂住報本禪院。一日陞座說偈曰。五十五年夢幻身。東西南北孰爲親。白雲散盡青山外。萬里秋空片

月新言訖而化。遺言葬峴山之陽。弟子元正問何獨念峴山乎。元曰。它日可建寺也。後三十年。楚國公王黼追慕道風。爲請於朝。賜諡證悟禪師。塔曰定應。勅建顯化寺。歲度僧以奉香火。一如元之所記云。

戒禪師

戒禪師不知何許人。自慧林得旨。後住杭州西湖一刹。住揚州石塔。忽退席渡江。時蘇東坡知揚州。重請住持。有爲東坡而少留之語。晁無咎學士爲宣之。戒於此。名重一時。東坡又爲作戒衣銘云。石塔得三昧。初從戒。

定人是故常寶護登壇受戒衣吾聞得道人一物不可  
留云何此法衣補緝成百納諸法念念逝此衣非昔衣  
此法無生滅衣亦無壞者振此無塵衣洗此無垢人壞  
則隨他去是故終不壞戒爲東坡所知是必有可知者  
或云東坡守杭日戒常卓錫湖上然莫詳其住處也

### 正覺

正覺隰州李氏子母夢異僧解環繫其右臂乃孕自是  
齋戒及誕右臂肉隱起若環七歲日誦數千言祖寂父  
宗道久叅佛陀遜禪師嘗指覺謂其父曰此子道韻非

常倚出家必爲法器十一得度於淨明本宗十四具戒十八遊方與祖訣曰若不發明大事者誓不歸矣至汝州香山成枯木一見器重一日聞僧誦蓮經至父母所生眼悉見三千界瞥然有省卽陳香山香山未肯曰別見人始得卽造丹霞霞問如何是空劫以前自己覺曰井底蝦蟆吞却月三更不借夜明簾霞曰未在更道覺擬議霞打一拂子曰又道不借覺言下釋然遂作禮尋過圓通時真歇初住長蘆遣僧邀至衆出迎見其衣屨穿弊咸輕之真歇命侍者易以新履覺却曰吾爲履來



耶衆聞心服懇求說法居第一座後出住泗州普照次  
補太平圓通能仁及長蘆曉居天童衲徒雲奏上堂今  
日是釋迦老子降誕之辰老僧不解說禪與諸人畫箇  
樣子祇如在摩耶胎時作麼生以拂子畫此○相曰祇  
如以清淨水浴金色身時又作麼生復畫此○相曰祇  
如周行七步目顧四方指天超地成道說法神通變化  
智慧辯才四十九年三百餘會說青道黃指東畫西入  
般涅槃時又作麼生乃畫此○相復曰若是具眼衲僧  
必也相許其或未然一一歷過始得僧問如何是向去

底人覺曰白雲投壑盡青嶂倚空高曰如何是却來底人覺曰滿頭白髮離巖谷半夜穿雲入市廛曰如何是不來不去底人覺曰石女喚回三界夢木人坐斷六門機乃曰句裏明宗則易宗中辨的則難良久曰還會麼凍鷄未報家林曉隱隱行人過雪山紹興丁丑十月沐浴更衣端坐顧侍僧索筆書偈曰夢幻空花六十七年白鳥烟沒秋水連天拂筆而逝

淨源

淨源字伯長姓楊氏杭州人生而敏慧依東京報慈寺

海達大師得度。奮志參尋。盡得華嚴奧旨。聲譽籍甚。左丞蒲公守杭。以慧國院易禪爲教。命源居之所。至編素景慕。高麗國王子爲僧。曰統義天。航海而來。問法。元祐三年。示寂。瘞院之西北。世壽七十有八。

### 景深

景深台州人。姓王氏。年十八。依廣度院德芝剃染。始謁淨慈象禪師。一日聞象曰。思而知慮。而解。皆鬼家活計。意不自適。遂詣寶峰求入室。峰曰。宜須斷起滅念。向空刳已。前掃除玄路。不涉正偏。盡却今時。全身放下。放盡。

還放方有自由。分深開頓悟。厥旨峰巒鼓告衆曰。深得  
開提大死之道。後學宜依之。因號大死翁。建炎改元。開  
法智通上堂來。不入門去。不出門來。去無痕。如何提唱。  
直得古路苔封。羶羊絕跡。蒼梧月鎖。丹鳳不栖。所以道。  
藏身之處。沒蹤跡。沒跡蹤處。莫藏身。若能如是。去住無  
依了。無向背。還委悉麼。而今分散如雲鶴。你我相忘。觸  
處玄紹興壬申二月示病。乃曰。世緣盡矣。復爲衆小。衆  
仍說偈曰。不用剃頭。何須澡浴。一堆紅燄。千足萬足。雖  
然如是。且道向上還有事也無。遂欬目而逝。

智明

智明四明黃氏子。依寶峰有年。無省。因爲衆持鉢。峰自題其像云。雨洗淡紅桃萼嫩。風搖淺碧柳絲輕。白雲影裏怪石露。綠水光中古木清。噫。你是什么人子。焦山枯木成禪師見之。歎曰。今日方知此老親見先師來。朋遂請益其贊。成曰。豈不見法眼拈夾山境話曰。我二十年祇作境會。朋卽契悟。乃曰。元來恁麼地。成曰。汝作麼。生會。朋曰。春生夏長。秋收冬藏。成曰。直須保任。朋曰。喏。紹興初。出住華嚴。婺之天寧。後遷清涼。上堂。海風吹夢。嶺猿

啼月敢問諸人是何時節。恁麼會得無影樹下任遨遊。  
其或未然。三條椽下。直須打徹。後退居。明之瑞巖。建康。  
再以清涼。挽之。明守亦勉其行。朋不從。作偈送使者曰。  
相煩專使入烟霞。灰冷無湯不點茶。寄語甬東賢太守。  
難教枯木再開花。未幾示寂。

道平

道平處州人。法嗣大滄詰禪師。住東京智海寺。上堂舉。  
盤示衆曰。似地擎山。不知山之孤峻。如石含玉。不知玉。  
之無瑕。古人恁麼說話。大似抱贓叫屈。智海門下。人人。

慷慨生擒猛兇活捉猊龍眼裏着得須彌山耳裏着得  
大海水遂拈拄杖曰不是向人誇伎倆丈夫標致合如  
斯卓拄杖下座

普能

普能杭州人姓呂氏嗣法慶善晨禪師繼爲說法四衆  
雲集上堂拈拄杖曰未入山僧手中萬法宛然旣入山  
僧手中復有何事良久曰有意氣時添意氣不風流處  
也風流卓拄杖一下

繆道者

繆道者，西安人。居口山，多猛獸阻險，往來者懸崖攀木，累足以行。春夏山水暴漲，則又病涉。道者來住甘泉寺，鑿山開道，遇虎狼則手撫之去。熙寧間坐逝，出三昧火，自焚其身。人號金川聖者。

### 法如

法如，衢州人，姓徐氏。初參雲蓋守智禪師，悟汾陽十智同真話，尋常提唱，多說十智同真。故叢林號爲如十同。水庵圓極皆依之。圓極嘗贊之曰：生鐵面皮，難湊泊等閒舉步，動乾坤。戲拈十智同真話，不負黃龍嫡骨孫。上



堂知見有知卽無明本。知見無見斯卽涅槃。無漏真淨。  
云何是中更容他物。釋迦老子。和身放倒。後代兒孫。如  
何接續。要會麼。通玄不是人間世。滿目青山何處尋。

如庵主

如庵主不知何許人。住天台。山久依法真。因看雲門東。  
山水上行語。發明已見歸隱故山猿。鹿爲侶。郡守聞其  
風。遣使逼令住持。如作偈曰。三十年來住此山。郡符何  
事到林間。休將瑣瑣塵寰事。換得一生閒。又聞遂焚其  
廬。竟不知所止。

如哲

如哲未詳族里。初住越州。天衣退席後。住平江之萬壽。飲啖無擇。人多侮之。有以瑞巖喚主人。公詰問者。哲荅以偈云。瑞巖長喚主人。公實出須彌最上峰。大地歡禪無覓處。笙歌一曲畫樓中。一日。曰。吾行矣。令拂拭所乘筓。與乃書八字示衆曰。道在用處。用在死處。因叙平昔。恭問。勉衆進脩。已忽。豎起一拳曰。諸人且道。這箇落在甚處。衆無對。哲揮案一下曰。一齊分付與秋風。遂入與端坐而逝。

淨梵

淨梵嘉興人。姓筴氏。母夢光明滿室。見神人似佛。因而懷娠。生十歲。依勝果寺祝髮。嗣湛謙二法師。初住無量壽院。凡講法華經十餘過。大觀中。結二十七僧。脩法華懺。咸普賢授羯摩法。呼淨梵比丘。名聲如撞洪鐘。時長洲令王度目擊其事。題石爲記。化後荼毘。有舍利五色。惟尚

惟尚不知何許人。初叅覺印。問曰。南泉斬猫兒。意旨如何。印曰。須是南泉始得。印卽以前語詰之。尚不能對。至

僧堂忽大悟曰。古人道。從今日去。更不疑天下老和尚。舌頭信有之矣。述偈呈印曰。須是南泉第一機。不知不覺。驀頭錐。覷面若無青白眼。還如鵬鵬守空池。舉未絕。印監奉曰。正當恁麼時。作麼生。尚掀倒禪床。印遂喝。尚曰。賊過後。張弓便出。住臨安廣福院。室中問僧提起來。作麼生會。又曰。且道是箇甚麼。要人提起。

洪寧

洪寧。姓杜氏。衢州人。得法於寶寧。英禪師。住明州雪竇。上堂。百川異流。以海爲極。森羅萬象。以空爲極。四聖六

宅以佛爲極明眼衲僧。以往杖子爲極。且道拄杖子以何爲極。有人道得。山僧兩手分付。倘或未然。不如悶倚禪林。畔留與兒孫指路頭。

寶月

寶月越州人。姓鄭氏。金山慧禪師法嗣。住常州報恩號。曰。覺然上堂示衆曰。學者無事。空言須求妙悟去。妙悟而事空言。其猶逐臭耳。雖然如是罕逢。穿耳客多遇刻舟人。一日謂衆曰。世緣易染。道業難辦。汝等勉之。語卒而逝。

楚明

楚明百粵張氏子得法善本禪師住淨慈寺隨機說法當時以爲東南佛眼上堂云祖師心印非長非短非方非圓非內非外亦非中間且問大衆決定是何形貌拈拄杖曰還見麼古篆不成文飛帛難同體從本自分明何須重特地擎禪床下座

思慧

思慧錢塘人姓俞氏嗣法洪雲住福州雪峰上堂一切法無差雲門胡飯趙州茶黃鶻樓中吹玉笛江城五月

落梅花慚愧太原孚上座五更聞鼓角天曉弄琵琶喝  
一喝下座

果昌

果昌安吉人姓時氏從善本禪師得法後住婺州寶林  
提唱法雲之旨嘗與提刑楊次公同遊山次楊拈起大  
士飯石問既是飯石爲甚麼咬不破昌曰祇爲太硬楊  
曰猶涉繁詞昌曰未審提刑作麼生楊曰硬昌曰也是  
第二月楊爲寫七佛殿額乃問七佛重出世時如何昌  
曰一回相見一回新上堂一卽一二卽二饒著直先無

香氣騰拈拄杖卓一下曰。識得山僧。柳栗條莫向南山尋。鼈鼻。

慧辯

慧辯字訥翁。華亭傅氏子。出家普照。得法於明智智命代講。尋徙天竺。從親座聽法者。日常千指。時翰林沈時卿守杭。以嚴猛爲治。僧徒見者。皆恇懼。辯獨從容如平。日沈異之。裨蒞僧職。蘇東坡作倅。高其行。與爲方外交。辯容止端靜。不蓄長物。有盜夜入其室。辯脫衣與之。使從支徑遁去。後隱草堂。將示寂。遺命須東坡至。方闔金。



四日而東坡至見其端坐如生頂尚溫遂作三絕以哭之時熙寧六年也

### 有規

有規婺州人姓姜氏得法法雲於安吉州道場山卓庵以居學者雲赴上堂拈拄杖曰還見麼窮諸玄辯若一毫置於太虛竭世樞机似一滴投於巨壑德山老人雖則焚其蔬鈔也是賊過後張弓且道文彩未彰以前又作麼生理論三千劍客今何在獨許莊周致太平化士出問促裝已辦乞師一言規曰好看前路事莫比在家

時曰。慙慙則三家村裏十字街頭。等箇人去也。規曰。願打失布袋。

惟湛

惟湛義烏人。姓宋氏。父母違異。僧曰。汝生子六人。第五者宜令出家。後入道。雙林草庵。思得度。首謁神照。復往。廣智。嘗白智曰。師所授者。我無疑焉。若圓頓絕待之旨。當須自得。後敷講於雲間。超果大揚化道。天台一宗。振於三吳。自湛始。熙寧六年三月。默坐而逝。火浴之。項舍利粲然。

從諫

從諫松陽人。幼見佛經。卽能自誦。出家。卽謁天竺辯才。  
性根鋒利。往往薦機言。下辯才歎曰。吾道由子而弘。努  
力努力。由是聲播講席。嘗以道力扣大通。通一日作書  
寄之。諫發緘觀黑白二圓相。乃荅偈曰。黑相白相擔枷。  
過狀了不了。今無風起浪。若問究竟事。如何。洞庭山在  
太湖上。大觀二年。沐浴更衣。升座說法。書偈而逝。賜號  
慈辯大師。

妙源

妙源字晉之。慈谿人。清苦峭厲。貌癯瘠。無威儀。嘗衣蘆花衣服。鐵襪口。誦佛號不輟。每跣足乞食於道。未入口。遇饑者輒分餒之。以爲常。得法於愚公。愚晚歲開講經山。學者雲集。每令源代其酬答。往往機鋒電掣。卒不可得縛及風止。水靜。意泊如也。主定水。同學滿戶外。將示寂。勅弟子勿火。勿塋。委身尸陀。以飼烏鳥。

梵卿

梵卿姓錢氏。嘉興人。得旨東林總禪師住紹興之象田。大弘法席。僧問象田有屠龍之劍。欲借一觀。時如何。梵

橫按拄杖僧便喝梵擲下拄杖僧無語梵曰這死蝦蟇  
上堂佛法到此命若懸絲異同超宗亦難承紹豎起拂  
子曰賴有這箇堪作流通於此覷得便見三世諸佛向  
燈籠露柱裏轉大法輪六趣衆生於鐵圍山得聞法要  
聲非聲見色非色隨異類四生各得解脫如斯舉唱非  
但埋沒宗風亦乃平沉自己且道如何得不犯令去拍  
禪床下座

澄月

澄月不詳氏族婺州智知山嗣如禪師之法嗣也得法

後住於承天僧問如何是道月曰殘陽戀幽草問如何  
是佛法大意月曰今年柴米貴臨示寂有頌曰去也何  
之住兮何所去住何從超然絕侶臨岐一句向誰舉銀  
潢夜白孤蟾吐言畢跌坐而逝

### 照伯

照伯不知何許人居崇教寺塔下夏坐則向日冬卧則  
擁雪或引紙縱筆濃淡橫斜初若狂言終無不驗宣和  
己亥正旦忽持巨軸與一往還士人緘縢甚密已乃行  
哭於市其中所言自方寇猖獗次及遼亾迄於中興時

日不易一日忽辭寺僧去或問何往曰不天台不五臺  
不東去不西來沿道誦謬數日跌坐塔下視之死矣衆  
欲昇入寺忽躍起狂走從寺後登山緣高如猿猱衆隱  
卽之望木杪騰踊者數十忽不知所之

### 法濟

法濟臨海人師黃岩浩先罕卧食冬夏不爐不扇建炎  
寇亂與其徒各爐一指以保城邑每誦法華至藥王品  
輒太息曰身如垂疣附贅虛生浪死何益遂采薪自焚  
是夕星月皓然忽天雨白花大如朔雪清旦拾遺骨得

舍利五色者數升

日益

日益不知何許人。嗣法保寧仁勇禪師。住安吉州上方寺。開筵說法。提唱爲玄素所宗。一日上堂。乃左右顧視曰。黃面老周。行七步。脚跟下正好一錐。碧眼胡兀坐九年。頂門上可惜一劄。當時若有箇爲衆竭力底衲僧。下得這毒弄也。免得拈花微笑。空破面顏。立雪齊腰。翻成轍迹。自此將鑄就錯。相篋扛篋。遂有五葉芬芳。千燈續焰。向曲录木上唱。一作三。於柳栗枝頭。指南爲北。直得



進前退後有問法問心之徒倚門傍牆有覓佛覓祖底  
漢庭前指柏便喚作祖意西來日裏看山更錯認學人  
自己殊不知此一大事本自圓明盡未來際未嘗間斷  
不假脩證豈在思維雖鶯子有所不知非滿慈之所能  
荐不見馬祖一喝百丈三日耳聾寶壽令行鎮州一城  
眼瞎大機大用如迅雷不可停一唱一提似斷崖不可  
履正當恁麼時三世諸佛祇可傍觀六代祖師證明有  
分大衆且道今日還有證明底麼良久曰割

淨曇

淨曇嘉禾人嗣法寶寧璣禪師晚住錢塘之法慧一日  
上堂本自深山卧白雲偶然來此寄閒身莫須問我禪  
兼道我是喫飯衲屎人紹興丙寅夏舜朝貴歸付院事  
四衆擁跏揮扇久之書偈曰這漢從來沒縫罅五十六  
年成話擲今朝死去見閻王劒樹刀山得人怕遂打一  
圓相曰噯一任諸人鑽龜打瓦收足而化

法達

法達不詳氏族爲南嶺嚴慈感禪師法嗣任明州阿育王寺一日上堂曰居山日少出山多惹得閒名幾

何爭似白雲深處坐。野猿幽鳥任高歌。大衆拈花示衆。  
空目點眉微咲。破顏落第二月。少林面壁。倘若無人半  
夜渡江。貪程太速。更乃說佛說祖。頭上安頭。演妙談玄。  
泥中洗土。攢花簇錦。口是禍門。寂爾無言。守村行鬼。總  
不如無孔鐵錐。行道之人。如何卽是。還會麼。白雲雖是  
無心物。到頭還是戀青山。

立禪師

立禪師麗水人。住法海寺。法鼓之音。振於四部。時道君  
皇帝幸林靈素。改寺爲神霄玉清萬壽宮。立上堂云。都

緣未徹。所以說是說。非蓋爲不真便。乃分彼分此。我身  
尚且不有身外。何足道哉。今聖君垂旨。改佛殿爲神霄。  
釋迦老子。頭上添箇冠兒。有何不可。老僧不免橫擔拄  
杖。高挂鉢囊。向無根樹下。嘯月吟風。於無縫塔中。安身  
立命。去也。一任乘雲仙客。跨鶴高人。來此呪水書符。叩  
牙作法。他年成道。白日上昇。堪報不堪之恩。以助無爲  
之化。惟恐不是玉。是玉也。大哥。且道山僧轉身一句。還  
作麼生。遂擲杖端坐而化。

懷志婺州人。姓吳氏。年十四。師智慧院寶僊。二十二試  
所習落髮肄講。十二年。宿學敬慕。嘗欲會通諸宗。正一  
代時教。有禪者問曰。杜順乃賢首宗祖師也。談法身。則  
曰。懷州牛嶺水。益州馬腹脹。此偈合歸天台。何義邪。志  
無對。卽出游方。晚至洞山。謁眞淨。問古人一喝不作一  
喝。用意旨如何。淨叱之。志趣出。淨笑呼曰。浙子。齋後遊  
山好。志忽領悟。久之。辭去。淨曰。子所造雖逸。格惜緣不  
勝耳。因識其意。自是諸方力請出世。志却之。居二十年。  
不與世接。士夫踵門。略不顧。有偈曰。萬機休罷付痴憨。

踪跡時容野鹿。叅不脫麻衣。拳作枕。幾生夢在綠蘿庵。  
或問住山多年。有何旨趣。志曰。山中住。獨掩柴門。無別  
趣。三箇柴頭品字煨。不用拔毫文彩。露崇寧二年六月。  
晦。問侍僧曰。早暮曰已夕矣。遂笑曰。夢境相逢我睡已。  
覺汝但莫負叢林。卽是報佛恩德。言訖示寂於最樂堂。  
茶毘收骨塔於乳峰之下。

印首座

印首座不知何許人。自參真淨徹證宗猷。歸遁婺州之  
雙溪。一日偶書曰。朽脚錯兒湯自煨。飯餘長自坐堆堆。

一從近日生涯拙，百鳥銜花去不回。又以觸衣碎甚，作偈曰：不挂寸絲，方免寒何須特地裹長竿。而今落落零零也。七佛之名甚處安。

德週

德週信州人，俗姓璩氏。於景德尊勝院染削，問道有年。後至黃龍，聞舉少林面壁頓悟述二偈以呈黃龍，許之。自是名流江浙。後於溫州光孝寺開筵說法，上堂曰：舉體露堂堂，十方無罣礙。千聖不能傳，萬靈成頂戴。擬欲共商量，開口百雜碎。祇如未開口，已前作麼生。咄。

法空

法空江西人遺其姓氏爲人強項久侍死心得旨後欲  
辭去死心記云汝福薄宜以道自養空遂辭行清草堂  
以偈送之云十年聚首龍峰寺一悟真空萬境閒此去  
隨緣且高隱莫將名字落人間後出世杭州南蕩不踰  
月而院被火了無孑遺空歎曰吾違先師之言故有今  
日之難有富人欲獨迎齋而捨三門空曰公欲施財邀  
福非長老受賜若教我背衆而食所不願也空既汨沒  
於土木道遂不行草堂嘗遣僧賚衣一襲訪之衲子聞



多往依之而空亦老矣後示寂於本山

性空

性空漢州人先依死心獲證乃抵秀水追船子遺風緒  
菴青龍之野吹鐵笛自娛興至多爲詩詠得之者必珍  
藏以爲拱壁不啻也其山居曰心法雙忘猶得妄色塵  
不二尚餘塵百鳥不來春又過不知誰是住庵人又警  
衆曰十二時中莫住工窮來窮去到無窮直須洞徹無  
窮底踏倒須彌第一峰建炎初徐明叛道經烏鎮肆殺  
戮民多逃亡空獨荷策而往賊見其偉異疑心詭伏者

問其來。空曰。吾禪者。欲抵密印寺。賊怒。欲斬之。空曰。大丈夫要頭便斫。奚以怒爲。吾死必矣。願得一飯以爲送終。賊奉肉食。空如常齋。出生畢。乃曰。孰當爲我文之。以祭。賊笑而不荅。空索筆大書曰。嗚呼。惟靈勞我以生。則大塊之過。役我以壽。則陰陽之失。乏我以貧。則五行不正。困我以命。則時日不吉。吁哉。至哉。賴有出塵之道。悟我之性。與其妙心。則其妙心。孰與爲隣。上同諸佛之真化。下合凡夫之無明。纖塵不動。本自圓成。妙矣哉。妙矣哉。日月未足以爲明。乾坤未足以爲大。磊磊落落。無

至無碍六十餘年。和光混俗。四十二臘。逍遙自在。達人  
則喜見佛。不拜笑矣乎。笑矣乎。可惜少年郎。風流太光  
彩。坦然歸去。付春風。體似虛空。終不壞。尚餐。遂舉。簞。飢  
餐。賊徒大笑。食罷。復曰。劫數既遭。離亂。我是快活。烈漢。  
如今正好乘時。便請一刀兩段。乃大呼。斬。斬。賊方駭異。  
稽首謝過。令衛而出。烏鎮之。廬舍免焚。實空之力也。道  
俗聞之。愈敬。有僧觀空。見佛不拜。乃逆問曰。既見佛。爲  
甚麼不拜。空掌之曰。會麼。云不會。空又掌曰。家無二主。  
紹興庚申冬。造大盆穴而塞之。脩書寄雪竇。持禪師曰。

吾將水葬矣壬戌歲持至見其尚存作偈嘲之曰掛哉  
老性空剛要餞魚鼈去不索性去愁骨向人說空閑偈  
笑曰待兄來證明耳令徧告四衆衆集空爲說法要仍  
說偈曰坐脫立亡不若水葬一省柴燒二省開墳撒手  
便行不妨快暢誰是知音船子和尚高風難繼百千年  
一曲漁歌少人唱遂盤坐盆中順潮而下衆皆隨至海  
濱望欲斷目空取塞肩水而同衆觀水無所入復乘流  
前往唱曰船子當年逐故鄉沒踪跡處妙難量真風機  
寄知音者鐵笛橫吹作散場其笛聲嗚咽頃於蒼茫間

見以笛擲空而沒衆號慕圖像事之後三日於沙上跏  
坐如生道俗爭往迎歸留五日閣維設利大如菽者無  
筭二霍徘徊空中火盡始去

### 道琛

道琛永嘉人姓彭氏出家樂清政洪院傳天台教觀忽  
一夕悟旨不假筌蹄而言辯如流紹興間住賢福寺每  
堂厨不給則以法衣質於庫至夜衣卽現光質家以爲  
異屢歸之江心真歇天童覺老皆尊師之後住四明延  
慶士俗傾嚮皆謂活佛出世云

空空外

卷之六

七

光緒堂

道隆

道隆桐廬人。姓董氏。於嚴州鍾山得度。杖錫遊方。所至者。神皆爲推重。晚抵黃龍。死心。心延爲首座。無以順世。遂歸隱鍾山。慕陳尊宿高世之風。掩關不事事。日甯數簞。自適。人無知者。手常穿一襪。凡有禪者。至提以示之。曰。老僧這襪著三十年了。也有寺僧戲問。如何。是無諍三昧。隆便掌。

普崇

普崇慶元人。嗣法草堂清禪師。開講育王上堂。示衆。舉

巴陵和尚道不是風動不是旛動不是風旛又向甚麼處着有人爲祖師出氣出來與巴陵相見雪竇和尚道風動旛動既是風旛又向甚麼處着有人爲巴陵出氣出來與雪竇相見崇曰非風非旛無處着是旛是風無着處遼天俊鶻悉迷蹤踞地金毛還失措阿呵呵悟不悟令人轉憶謝三郎一絲獨釣寒江雨

法一

法一姓李氏襄陽郡王道勉之玄孫也世居祥符毋夢梵僧托舍而生年十七成上庠從祖仕淮南欲官之不

就將棄家從釋。祖弗許。毋曰。微之。昔夢當是宿老沙門。遂從靈巖通照愿禪師。祝髮登具。依愿十年。了無契入。乃謁圓悟於蔣山。悟曰。此法器也。署爲首座。尋謁草堂於疎山。薦於言下。紹興初。請居延福。退席歸天台。萬年觀。

清了

清了。西蜀左綿人。姓雍氏。稚齒出家。登年受具。初見丹霞淳禪師。悟旨。後謁長蘆照禪師。一見審之。命歸侍。踰年。分坐。未幾。照稱疾。退闢。命了繼席。學者好歸拈香。



時照付衣擬拈出及見而爲丹霞令侍者扯去了預備  
布伽黎於袖遂搭以示衆據拄杖云看看三千大千世  
界一切搖動雲門大師卽得雪峰門下卽不然卓拄杖  
一下云三千大千世界向甚麼處去還會麼不得黃梅  
雨秋苗爭得青紹興間李守光命主龍翔藉緣力合二  
刹爲一今爲江心寺祖師

法清

法清嚴陵人稚齒出家卽以弘法爲已任嘗於池之天  
寧以伽黎覆頂而坐曾侍郎開問曰上座生身何處曰

空空外

嚴州曰與此間是同是別清檇伽黎下地揖曰官人曾  
到嚴州否曾罔措清曰待官人到嚴州却向官人道後  
於慧日雅禪師座下得旨遂住隆興九僊上堂曰萬柳  
千花暖日開一華端有一如來妙談不二虛空藏動着  
微言徧九垓笑咍咍且道笑箇甚麼笑覺苑脚跟不點  
地

佛心

佛心姓朱氏壽昌人耕山誦佛遇亢陽常有黃雲覆其  
頂諾人以雨輒驗一日至葉樞密家求山水衣樞密曰

無有心曰在某篋笥中良久又曰吾帶一小畜至恐驚人當出收之家人覘其後見一虎繫於府前柏樹上掘密見其靈異遂舉衣與之紹興二十九年二月八日忽書偈云六十一年住世間隨流來往度塵寰今日已歸霄漢去碧雲空外有青山趺坐而化自焚其身至今野燒至此卽滅春草不生以存靈跡

象禪師

象禪師越州山陰人得法淨慈明公遂嗣講席上堂古者道一翳在眼空花亂墜拈拄杖曰淨慈拈起拄杖豈

不是一翳在眼百千諸佛總在拄杖頭現丈六紫磨金色之身乘其國土游歷十方說一切法度一切衆豈不是空花亂墜卽今莫有向拄杖未有已前坐斷得麼出來與淨慈相見如無切忌向空本無花眼本無翳處著到乃擲拄杖下座